

**Date – 06/03/2026**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Vice President CP Radakrishnan-an thlaite chu ruihhlo bawiha tang lo tur leh social media in phuar buai tir lo turin a chah.
2. Naktuk Pathianni, International Women’s Day-ah Women & Child Development department chuan kumin thupui, "Pekin lukhawng a nei" tih pualin bai leh chawhmeh insuah ni atan hman ni thei se a ti.
3. Eirawngbawlna gas non-subsidized LPG chu ramchhung khawpui lianah cheng 60 a man tihsan a ni
4. Asia khawthlang lama indona chuan a ni riatna a thleng tawhin inepna boruak a lian telh telh.



**MZU 20 TH CONVOCATION**

Vice President CP Radakrishnan-an thlaite chu ruihhlo bawiha tang lo tur leh social media in phuar buai tir lo turin a chah.

Vawiina Mizoram University Convocation vawi 20-na a hmanpui na ah he thu hi sawiin Vice President chuan tunlai khawvel zim tawh tak, thiamna sang zawk Artificial Intelligence ten nasa taka khawl a pawh hnaih hnuah social media te phei chuan mawhphurhna hriaa hman a pawimawh hle a ni a ti a, mahni thiamna leh theihna te, hnam ziarang leh nunphung pholanna atan te tangkai zawka hman ni se, tul lova social mediaa hun khawhral chu a paw hle a ni a ti.

Vice President chuan Mizoram leh India sawrkar inremna chu Remna ziah zinga hlawhtling ber a ni a ti a, Mizoram chu India rama hmun ralmuang ber pawl a ni a, Remna ziah chuan hmasawna a keng tel tih sawiin Remna ziah tawh zingah hlawhtling ber ani tih a sawi.

Pu CP Radakrishnan chuan Hun hmasa lam nena tehkhinin hmarchhak bialah hmasawna tam tak a thleng a ti a, thalaiten nasa takin hma an sawn tih sawiin kum 2047-a India in Ram Hmasawn nih a tumna kawngah Mizoram chu hmun pawimawh tak a ni a ti a, sawrkar laipuiin Hmarchhak bial a ngai pawimawh tih

sawiin ramchhunga thalaite hmasawn rualin Mizo thalaite chu hmasawna kawng zawh turin a sawm a ni.

Vice President chuan state chhungah hmasawna ruhrel hrang hrang din a ni a ti a, Aizawl khawpui chu rel kawngin a tlawh tawh a, Kaladan Multimodal Transit Transport Project peihfel tep ani tawh a ti a, hei hian ram thenawm nen insumdawna tur kawng awlsam a siam dawn tih a sawi.

Vice President chuan Mizoram chu chawlh hahdamna atan hmun nuam tak ani a ti a, hetih rual hian ramngaw leh luidunga nungchate humhim kawngah theihtawpa tan lak a ngai a ti a, Mizo thalaite chu hemi kawngah hian ke pen an ngai tih sawiin thangthar lo awm zel tur tan kawng sial sak turin a chah a ni.

Larsap Gen (Rtd) Vijay Kumar Singh a pawhin thusawiin zirlai hlawhtling te chu a lawmpui thu a sawi a, MZU chu ramchhung hmundang nena tehkhinin zirna hmun tha leh zirlai tam tak chhuanawm tak tak anlo chhuah tawhna a ni a ti.

Mizoram chu hun rei tak chhung midangte inngaihsakna, lekhathiam tamna leh mi hawihhawm tamna hmun a ni tih sawiin Mizoram hming thatna chhawm nung zel turin a chah a, zirlaite chu Mizoram hmahlir anni tih sawiin ram hmasawna ngai pawimawh turin a chah a ni.

Chief Minister Pu Lalduhoma chuan ram hmasawn zelah thalaite chu an pawimawh avangin khua leh tui hmasawn zawk an nih theih nan theihtawp chhuah turin a chah a, Mizoram chu lekhathiam state nia chhal anni tawh tih sawiin thalaiten hmakhaw eng tak an nei a ti a, Digital State hmasa ber turin sawrkarin hma a la mek a, MZU chuan hemi kawngah hian hmun pawimawh tak an luah tih a sawi.

Chief Minister chuan MZU in zirlai chhuanawm tak tak a chher chhuak tawh a ti a, Mizoram chuan zirlai mai bakah thalai hmasawn duh leh bultan duh te nasa takin a pui tih sawiin hemi kawngah hian sawrkar pawhin nasa takin hma a la tih a sawi.

Vawiina Mizoram University Convocation ah hian zirlai 6385 ten degree an hmu a, heng zingah hian Doctor of Philosophy mi 147 niin Gold Medalist mi 43 an ni a, Book Prize winner mi 2 an awm bawk a ni.

<><><>

## **INTERNATIONAL WOMEN'S DAY 2026**

Naktuk Pathianni, International Women's Day-ah Women & Child Development department chuan kumin thupui, Give to Gain, "Pekin lukhawng a nei" tih pualin bai leh chawhmeh engpawh insuah ni atan hmang turin mipuite an ngen.

International Women's Day puala a thuchahah Women & Child Development Director Pi Zoramthangi Chhangte chuan he sawmna hi a siam a ni.

Pi Zoramthangi Chhangte chuan tunlai khawvelah hmeichhiate dinmun a tha tawh tia sawi a nih laiin mahni inchnungkhura hleilenna tuar an la tam thu a sawi a. Women Helpline atanga phone call an dawn atangin hmeichhia tam tak mahni inchnunga kut tuar an la tam hle tih a lan thu a sawi a. Zirna lamah pawh tunlaih hmeichhiaten duh duh an zir thei tih a ni chungin STEM education-ah hmeichhia an la tlem thu leh subject thenkhat, Physics, Engineering leh Maths te chu nu leh pa tam

takin an fanu te zir chia ngai lo an la tam thu a sawi a. Infiamna lamah pawh hmeichhia te dinhmun a la hniam thu sawiin a bik takin football-ah an la hniam thu a sawi a. Nu leh pa ten an fanute eizawna tura ngai ngam lo an la tam tih sawiin nu leh pa tam tak rilru puthmang thlak a tul thu a sawi a ni.

International Womens Day pual hian kar leh lamah pawh hmeichhiate tana hun hman tum a ni a, kan corr report lo ngaithla ang.

VC

*National Commission for Women, New Delhi leh State Commission for Women chuan ram pumah "Maha Jan Sunwai" a buatsaih dawn a. International Women's Day pual hian district hrang hrangah an remchan dan angin Free Public Legal Hearing neih a ni dawn a, hetah hian hmeichhia dikna chanvo rahbehna hrang hrang tuar te chuan he hunah hian complain a thehluh theih dawn a ni.*

*Inchhungkura hleilenna, eng kawng pawha tawk te, nupa kar harsatna avanga hmeichhe chungah tawrhna thleng te, hnathawhna hmuna thawhpui mipate atanga harsatna tawk te, chhahih nawmnah tawkte leh eng kawng pawha hmeichhia nihna avanga hleilenna leh nek chepna tawk tan harsatna a thlen theih ang.*

International Women's Day pual hian Vairengte CIJWS te chuan a thlawna in entirna hun buatsaih in, he hmunah hian hmeichhia leh Naupang te tan bik a thlawin inentirna hun an hawng a ni.

Kan corr report lo ngaithla ang.

*Tukin dar 9 khan Vairengte CIJWS hmuna Nair Hall ah a thlawna inentirna hun hman a ni a. Medical Officer Captain Anjali Sharma hmeichhia te hrisel na kawnga in enkawl dan tur leh hriat tur tul te kalkhawm te hnenah a sawi a ni.*

*Medical Camp ah hian Apollo Clinic Silchar-a Ophthalmologist Dr Bikram Das, Gynaecologist Dr C.Lalnunpuia leh Dentist ten damlo inentir a duh apiang tan rawn theih in an thut bakah damdawi a thlawna pek an ni bawk .*

*He hun hi International Women's Day pual anih angin Hmeichhia leh Naupang tan chauh in entirna hun hi hawn a ni a. Tualchhung mi ten an hlut hle a in entir zawng zawng hi hriattheih chinah mi 300 an chuang a ni.*

<><><>

## **KOHRAN HMEICHHIA**

Mizoram Presbyterian Kohhran Hmeichhe Rorel Inkhawmpui vawi 13-na chu Champhai Vengthlang Presbyterian kohhran Biakin ah nizan atanga hman tan a ni.

Vawiin khan Palai atana thlan mi 1049 ten an Chairman, Pi K.Vanlalrawni kaihhruiin ro an rel a, Kum 2028-a Rorel Inkhawm vawi 14-na chu Sihphir-ah March 10-12 chhungin hman a ni ang.

Zanin inkhawmah Synod Moderator Rev. John Raldosanga'n thu a sawi ang a, naktuk atangin Inkhawmpui pual thupui tlawhchhanin thupui sawi tura ruat, Rev. Remlalfaka, Secretary, BSI Aizawl Auxiliary in inkhawm apiangin thu a sawi thin dawn a ni.

Tun dinhmunah Mizoram Presbyterian kohhran Hmeichhe inchhiarna atanga a lan danin Pastor bial leh kohhran mala zawmtu 223 awm mekin Hmeichhe member zat chu mi 2,08,921 an ni a. Pastor bial te zingah Champhai Vengthlang Pastor bial chu member tam berna niin member 3122 an awm a, Buarpui bial chu bial te ber niin member 36 an awm thung a ni.

<><><>

## **BCM ASSEMBLY**

Mizoram Baptist Kohhran Rorelna sang ber Assembly vawi 130-na Lunglei Bazar Veng Kohhran Biak in-a neih mekah chu ni thum chung ro an rel hnuin vawiin thlengin chhonzawm a ni.

An rorel inkhawm hi President thar Rev. Prof. R .Zolawma chuan a kaihruaia, President Elect atan Rev Dr R Lalthanmawia thlan a ni a, an thurel langsar zingah Baptist English School (BES) awmna hmun sawn, Inneihna buatsaih chungchanga hautak lo zawnga buatsaih tih te, Kohhran mi Politicsa in hmangate laka BCM-in beiseina a neih dan hrang hrang tarlan te puanchhuah tura ruahmanna chu an rem ti bawk a. Pastor Bial thar hawn belh leh siam rem te, Ruihhlo ngaite tana Half Way Home te, Hlemhletna dona kawnga chak zawka hma lak te, Sri Lanka-a Mission station buatsaih leh rawngbawlina zau zawk neih bakah Hnahthiala Baptist Higher Secondary school din te a tel a ni.

He an Assembly-ah hian rorel palai zawng zawng 1521 an ni a, Pawn lam atanga rawn hmanpuitu Delegates leh Oberver mi 32 an awm bawk a.

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

## **LPG**

Eirawngbawlina gas non-subsidized LPG chu ramchhung khawpui lianah cheng 60 a man tihsan a ni. Indian Oil Corporation Limited (IOCL) sawidanin Delhi khawpuiah chuan gas cylinder kg 14.2 chu cheng 853 atangin cheng 913 ah tihsan a ni a. Mumbai ah chuan gas man thar hi cheng 912 leh pawisa 50 a ni a, Kolkatta ah cheng za 9 leh 39 niin Chennaiah chuan cheng 928 leh duli a ni a. IOCL chuan Commercial LPG gas cylinder chu cheng 115 in a tisang bawk a. Gas man thar hi vawiin atangin hman a ni.

<><><>

## WEST ASIA

Asia khawthlang lama indona chuan a ni riatna a thleng tawhin inepna boruak a lian telh telh. Vawiin thlengin US, Israel leh Iran sipaite hi thlawhna leh drone hmangin an la inkap a. Hetiang boruak karah hian US President Donald Trumpa kaihhruai sawrkar chuan Israel hnenah ralthuam US dollar maktaduai 151 man hralh a remtih thu vawiin khan a puang a. Iran President Masoud Pezeshkian chuan US in intiamkamna awm lova Iran tlawm tura a phutna chu mumang lam thil mai mai chauh a ni ni dawn a ti a. Pu Pezeshkian chuan an chhehvel ram thenawm an kap tel palh chu pawl a tih thu sawiin sipaite inbiakpawhnaah thil kal fuh lo a awm vang niin a sawi a. Tehran chuan thenawm ramte a kah chu a titawp dawn tih a sawi a ni.

Hetihlai hian Russia President Vladimir Putin chuan Iran President Pezeshkian hi telephone hmanga biain an hruaitu ber thah anih bakah sawrkar mi pawimawh leh civil mi tam tak an thi chu a tawrhpuithu a sawi a. Russia chuan tuna inepna boruak chu tawp nghal se a duh thu sawiin inbiakna hmanga tihtawp a duh thu a sawi a ni.

<><><>